

Ur gwir plijadur eo din, e hanw *Ar Falz / Skol Vreizh*, resev ar vedalenn profet gant SUAUV, evid unan euz hon oberennoù nevez ha kozh war ar memez tro : « *geografiezh Breizh* », kaset da benn gant Pêr Rhun hag e skipailh, bet lakaet war ar rouedad gant Sandrine : ur yaouankiz nevez evid ul levr a oa bet embannet un 20 vloaz bennag, a oa diviet, hag a zo bet renevesaet penn da benn.

Evel ma ouzoc'h, ez eo deuet *Skol Vreizh* da vezañ ur gwir oaled krouidigezh sevenadurel evid Breizh hag ar Vretoned, da lavared eo ur gevredigezh vreizhad hag a ro an tu d'an oll re o deus un dra bennag a-bouez da lâred war hon bro d'henn ober, dindan an 2 stumm-mañ :

- krouidigezh skiantel, evel, da skwer, labourioù istorel J.J. Monnier hag O. Caillebot (tremen a ra er mareoù-man o *Istor Breizh* war Tébéo beteg Nedeleg), evel al labourioù war ar glad (da skwer studiadenn D. Leloup war tier pondalez Montroulez), evel c'hoazh oberenn P. Rhun, kaset da benn dindan ur stumm niverel.

- krouidigezh lennegel, e galleg evel levr A. Gwilhou, hini AS Ckloarec, pe hini JP Le Roux, an oll levrioù-man o tennañ, mui pe vui, da istor ha sokiologiezh hon bro ; krouidigezh e brezhoneg ivez, gant an teir oberenn da zond : roman Annie Coz, hini Goulc'han Kervella, ha studiadenn diwyezheg A. Kervern war an haikou.

Peseurt liamm a zo être an oll oberennoù-mañ, levrioù, CDoù, DVDoù ha niverel : un dra nemedkén, med a-bouez kenañ evidomp : rein a reont da anavezoud d'ar Vretoned ha d'ar re all ivez pegen pinvidig eo hon sevenadur hag hon lennegezh, e galleg hag e brezhoneg ; red eo dimp, un dever eo en gwirionez, difenn ha kas war-raog an oll binvidigezhioù-se, treuskas anezho d'ar rummadoù yaouank, mod all n'eus dazond ebed evito en o bro ; a-bouez eo kendrec'hiñ anezho o deus ar chañs da gaoud ur yezh, un glad, un istor, ha se abaoe ouzhpenn 1500 vloaz , med en danger emañ hon identelezh, red eo eta stourm evid derc'hel anezhi bew : setu peseurt stourm o deus choazet tud *Ar Falz / Skol Vreizh* da gas da benn bemdez evid brasañ mad Breizh hag he fobl.